



Aqqalu C. Jerimiassen

UKA 2025/7-2

Atassut

27. Oktober 2025

2026-mut Aningaasanut inatsisissatut siunnersuut

(Aningaasaqarnermut Akileraartarnermullu Naalakkersuisoq)

Atassummiit aningaasaqarnermut akileraartarnermullu ataatsimiitsitaliap sulilluarsimanera qujassuteqarfigerusupparput, maannakkumullu piffissami aningaasaqarnikkut unammillernangaaqisumik inissisimanitsinni akisussaassuseqarlualutik kumaarisimanerat erseqqarilluni.

Maannakkumullu annernassagaluarpalluunniit sorpassuartigut, allatut ajornaqaaq aaliangernissaq una tamatta akisussaaqatigiilluta tigusariaqarparput siunissarput qaamanerusinnaaqullugu.

Naalakkersuisullu maannakkumut suliaminni erseqqissarluartuaannarmassuttaaq qujamasunnarpoq, aaqqissuiffiqineqartuinnartut eqqornerlunnagit suut ilanngarneqartariaqarnerinik sapiissuseqarlutik iliuuseqarniarmata.

Ersiut taanna takuinnarjarput kingumunaasit, tassalu aningaasarsiornitta ataasiinnarmik annerusumik aallaaveqarpallaarnerata kinguneranik aningaasamiiallaffimmi qanorsuaq eqqornerluisoqarsinnaaneranik.

Aalisarnej soorunami tapersersortuassuarput, tassanili eqqarsaatigilluagassarput tassaavoq, ilumut taanna kisiat suli ukiorpanni aningaasarsiornitsigut nammattoriniarparput? Imaluunniit aningaasarsiorfissanik nutaanik ujartuinnermut maannagaaq aallullugu aallartinniarparput, taavalu tamassumunga qinikkat piumassuseqarpat?

Ukiorpanni aningaasarsiornerup allatigut isaatitsiviunissaa eqqartorneqartuarpoq, timitalerniarnerali akimmisaarneqartuartsimaqaaq.

Tamanna maannagaaq "sapiingilagut pisinnaavugut" nilliaatigiinnaqinagu aallarnisarniarta, taamatuttaarlu inuiaqatigiit pisortat aallartisaanissaat utaqqiunnaartariaqarpaat, oqartoqartarnera "uagut inerisarneqanngilagut" "uagut aamma inerisarneqarusuppugut, utaqqivugut" taarserneqartariaqarput "qanoq uagut aallartisarsinnaavugut aningaasarsiulerluta pisortat aallartinnissai utaqqinagit".

Aningaasarsiornerpummi siuariangaarunnanngilaq pisortat kisiisa aningaasarsiornerup ilusilersuisussaatur isumalluutiguarniarutsigit.

Naalakkersuisut allannguutissatut siunnersuuterpassui pingaarutillit assortorneqarsinnaanngillat, pingajussaaneerneqarsinnaalernissaanullu suli aaqqiissutissanik pitsaannerusunik nassaartoqarsinnaanissaa qularutiginnngilarput.



Kissaatigut tamaasa pisinnaanngilagut, tamatta kissaaterpassuaqaraluaqaagut, ajoqaarli nunatta karsi tassaannngimmat onkel Joakim-ip aningaasaasivissua, taamaaqqunaraluaqaarmi.

Taamaalisinnaanissaanulli nammineq inuiaqatigiittut aningaasarsiorluarnitsigut tamassumunnga qanillattortissinnaagipput qularnanngilaq.

Takornariaqarneq aningaasarsiorfiullualissasoq eqqartortuaannarparput, aningaasanullu inatsimmut iluaqutaalluatumik inissisimasualissappat, tikittut qanoq annertutigisumik inuiaqatigiinnut unnuinerminni tummarnerminnilu tunniussaqaqtarnissaat akisussaassusilimmik aaliangersaaffigisinnaasariaqarparput.

Suli inatsisissamut isumaqatigiinniarnarit partiit akornganni ingerlapput, atorluaqqunaqaarlu tassuuna isaatitsissutaasinnaasunik nutaanissaaq nassaarsinnaanissaaq siunissamut aningaasaliilluarnerusunik.

Imminut pilersornerusinnaaneq qaffassarujussuartaqarparput, taamaattumillu inuussutissalerinermut oqartussaaffiup tigusariaqarneranik siunertaqarnerput nangittumik tamaarsuuttariaqarparput, nunatta iluani immitsinnut pilersorinnaanerput eqaanneroqqullugu ineriartorsinnaalluarneroqqullugulu.

Ikummatissamik avataaniit eqqussuiuarnerput isumalluuteqarnerpullu suli ukiorpassuarni ingerlagallartussatut naatsorsuutigisariaqarparput, tassami sarfatortuinnarnut kissarsuutitut nuukkaluaraanniluunniit maanna ikummatissanik atuinngitsunut, ikummatissamik atuisut suli akilersinnaanerusarmata akikinnerusarlutillu ajoraluatumik, taanna suli isumalluuteqartuarnermut annertuumut takussutissaajuarpoq.

Nammineq taava uuliasiorniarta ila! Avataaniit uuliasiorumallutik qinnuteqartut aalluteqqilerniartigit, siunissaaq qorsuuneruniarpat nunarpassuit allat ukiorpanni ineriartornerminni ajoraluatumik aniatitseqqaarsimanerat co2-mik uagutsinnut pillaatisiaasariaqanngilaq, uagut aamma ineriartorluarsinnaasariaqarpugut avataaniit co2-mik qanoq aniatitsinitta naqissuserneqarsinnaanissaanik sooravallaanngikkaluarluta. Parisimummi isumaqatigiissut aatsaat tamakkiisumik atuutsilersinnaavarput iluamik ineriartorluareertilluta akissaqarlualereersillutalu, sumiiffinni co2-mik aniatitsivallaanngitsumik inaallagissiorfeqalersinnaanissatsigut.

Nunarput tamatsinnut toqqissisimanartuusariaqarpoq sumiikkaluaruttaluunniit, eqiterussineq iluatsinnikuunngilaq aamma atussanngilarput, aningaasarsiorfiit nutaat aqputissiuunniartigit, qularunnaamilaarluta allamiunullu pisuutitsivallaarunnaarluta, nallinnartuunngilagummi aamma nallinnarsarneqarusunngilagut!

Suli periarfissarpassuaqaagut, utaqqiinnarpallaarnerli inituallaarpoq sumiluunniit, taanna allanngortariaqarpoq, allap inerisaajumaarneranik utaqqineq akilersinnaanngilaq, uanniit ilinniillu taanna aallartissooq.

2026-imut aningaasanut inatsisissatut siunnersuut pingajussaaneerreqartigani ataatsimiitsitaliamit qulaarluarneqaqqinnissaa eqqarsaatigalugu, sulilluaqqinnissaanillu kiissaallugit Atassummiit aningaasaqarnermut akileraartarnermullu ataatsimiitsitaliamut innersuupparput.